

**Mesyuarat Perwakilan Dan Pemilihan Tiga Sayap Umno Berjalan Lancar  
Bernama  
12 Oct, 2013**

ALOR GAJAH, 12 Okt (Bernama) -- Mesyuarat perwakilan dan pemilihan kepimpinan Pergerakan Wanita, Pemuda dan Puteri Umno setakat ini berjalan lancar, kata Setiausaha Kerja Umno Datuk Ab Rauf Yusoh.

"Saya melihat kaedah serta penyusunan yang dibuat Jawatankuasa Pemilihan Umno bagi melancarkan pemilihan hari ini berjalan dengan baik dan semua prosedur yang diputuskan dari sudut pengagihan kertas undi, peti undi dan tempat mengundi juga diurus dengan baik," katanya kepada pemberita di sini.

Ab Rauf sebelum itu meninjau perjalanan mesyuarat dan pemilihan Puteri Umno Masjid Tanah di Sekolah Agama JAIM Paya Rumput.

"Para perwakilan diharap menjalankan tanggungjawab sebagai anggota parti memilih pucuk pimpinan dengan amanah yang diberikan, maka lakukan yang terbaik untuk parti, agama, bangsa dan negara," katanya.

Beliau berkata calon yang tidak terpilih pula diharap akan menerima keputusan yang dibuat para perwakilan.

Ab Rauf berkata maklum balas daripada 146,000 anggota perwakilan yang terlibat dalam pemilihan menggunakan sistem 'Electoral College' kali ini akan dijadikan rujukan bagi penambahbaikan untuk proses pemilihan parti akan datang.

Mengulas kedudukan anggota Jawatankuasa Bahagian Bukit Katil Haron Abdullah yang namanya terdapat dalam senarai calon layak bertanding merebut jawatan ketua bahagian walaupun telah menarik diri, Ab Rauf berkata ibu pejabat Umno belum menerima surat penarikan diri calon berkenaan.

"Ibu pejabat hanya dimaklumkan menerusi siaran akhbar, saya akan cuba dapatkan maklumat lanjut dari badan perhubungan Umno negeri...kita (Umno) akan lihat dari sudut kesahihan penarikan diri, kalau berlaku dalam tempoh yang dibenarkan, kita akan berikan pertimbangan khas," katanya.

Pengerusi Jawatankuasa Pemilihan Umno Melaka Tan Sri Ahmad Nordin Md Amin dilaporkan berkata pihaknya telah mengesahkan penarikan diri Haron menerusi surat makluman berhubung perkara terbabit yang dihantar ke Ibu pejabat Umno pada 24 Sept.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=985136>